



## ЎЗБЕКISTON RESPUBLIKASI VAZIRLAR MAHKAMASINING QARORI

20 20 yil « 30 » сентябрь

№ 595

Toshkent sh.

### **Опера санъатига ихтисослаштирилган мактаб-интернат ташқил этиш тўғрисида**

Опера санъатининг кўп асрлик ижро йўлларини пухта ўзлаштириш, ёш авлод вакилларига ўргатиш, уларга миллий ва жаҳон классик мусикасининг ноёб намуналаридан баҳраманд бўлишлари учун кенг имкониятлар яратиш, шунингдек, опера санъати бўйича малакали мутахассислар тайёрлаш тизимини янада такомиллаштириш мақсадида Вазирлар Маҳкамаси **қарор қилади:**

1. Ўзбекистон Республикаси Маданият вазирлиги, Қорақалпоғистон Республикаси Вазирлар Кенгаши, Ўзбекистон композиторлари ва бастакорлари уюшмасининг:

2021/2022 ўқув йилидан бошлаб Қорақалпоғистон Республикаси Нукус шаҳридаги 24-сон болалар мусиқа ва санъат мактаби негизида опера санъатига ихтисослаштирилган мактаб-интернат (кейинги ўринларда – мактаб-интернат) ташқил этиш;

мактаб-интернат учун қўшимча бино ва иншоотлар, шу жумладан, 100 ўринли ётоқхона ва ошхона, 120 ўринли қўшимча ўқув биноси қуриш тўғрисидаги таклифи маъқуллансин.

2. Белгилаб қўйилсинки:

мактаб-интернат Ўзбекистон Республикаси Маданият вазирлиги тизимидаги давлат ихтисослаштирилган таълим муассасаси ҳисобланади;

2021/2022 ўқув йилида мактаб-интернатнинг 5, 6 ва 7-синфларига, 2022/2023 ўқув йилидан бошлаб эса – 5-синфига 25 нафардан ўқувчилар танлов асосида қабул қилинади.

Ўзбекистон Республикаси маданият вазирига мактаб-интернатнинг моддий-техника базасидан, педагог кадрларнинг салоҳияти ва эҳтиёжидан келиб чиққан ҳолда кейинги йилларда ўқувчиларни қабул қилиш параметрларига ўзгартиришлар киритиш ҳуқуқи берилсин.

3. Ўзбекистон Республикаси Маданият вазирлиги:

а) 2021 йил 1 июнга қадар:

мактаб-интернатни жиҳозлаш учун мусиқа чолғулари ва ускуналарининг техник параметрларини ишлаб чиқиш;

мактаб-интернатнинг уставини тасдиқлаш ва белгиланган тартибда давлат рўяхатидан ўтказилишини таъминлаш;

б) 2021 йил 1 сентябрга қадар мактаб-интернатнинг самарали фаолият кўрсатишини ҳамда уни танлов асосида малакали педагог кадрлар билан таъминлаш;

мактаб-интернатни дарсликлар, ўқув-методик қўлланмалар ва бадиий адабиётлар билан таъминлаш чораларини кўрсин.

4. Қорақалпоғистон Республикаси Вазирлар Кенгаши Ўзбекистон Республикаси Маданият вазирлиги билан келишган ҳолда:

бир ой муддатда мактаб-интернатга бино ва иншоотлар курилиши учун белгиланган тартибда ер участкалари ажратилишини таъминласин;

2021 йил 1 августга қадар мактаб-интернат бино ва иншоотларини фойдаланишга топшириш чораларини кўрсин.

5. Қорақалпоғистон Республикаси Вазирлар Кенгаши мактаб-интернатнинг бино ва иншоотларини куриш ҳамда жиҳозлаш ишларининг молиялаштириш манбаларини белгилаш мақсадида икки ой муддатда тегишли қарор қабул қилсин. Бунда қуйидагиларни назарда тутсин:

Қорақалпоғистон Республикаси бюджетининг қўшимча манбалари;  
жисмоний ва юридик шахсларнинг ҳомийлик хайриялари;  
қонун ҳужжатларида тақиқланмаган бошқа маблағлар.

6. Белгилаб қўйилсинки, мактаб-интернатни жорий сақлаш учун Қорақалпоғистон Республикаси бюджети харажатлар параметрларига тегишли ўзгартиришлар киритилади, 2022 йилдан бошлаб эса харажатлар Ўзбекистон Республикаси Давлат бюджети параметрларида назарда тутилади.

7. Ўзбекистон Республикаси Маданият вазирлиги манфаатдор вазирликлар ва идоралар билан биргаликда ўзлари қабул қилган норматив-ҳуқуқий ҳужжатларни бир ой муддатда ушбу қарорга мувофиқлаштиради.

8. Мазкур қарорнинг бажарилишини назорат қилиш Ўзбекистон Республикаси Бош вазирининг ижтимоий ривожлантириш масалалари бўйича ўринбосари Б.А.Мусаев зиммасига юклансин.

Ўзбекистон Республикасининг  
Бош вазири



А. Арипов